

Vizyon

Oli drwa SNP?

Politik dan Sesel i kontinyen reste en Plalit kot sak zour i anmenn nouvo defi. Drwa fer miting i ganny restrikte malgre ki nou fer miting lo propriete prive. Lapolis i kontinyen swiv lord politik sorti kot bann sef dan SPPF zis pou anpes SNP fer son travay politik e fer lepep Seselwa konn tou sa bann kalite salte ki pe arive dan son pei. Le 3 Oktob zot ti bat nou, ozordi an 2009, nou pa konnen ki zot anvi fer.

Miting Aktivis

I vreman malere letan lapolis i servi bann leskiz pli enbesil zis pou blok nou miting avek nou bann aktivis. Konstitisyon i donn nou sa drwa koman en parti politik pour nou fer bann rasableman dan lape ek lord. Ziska aprezan se sa ki nou'n fer. Napa okenn lensidan ki'n arive letan nou'n fer sa bann miting. Me SPPF in realize ki dimoun i enterese pou vin devan koman bann aktivis pou ganny lenformasyon e alor tourn ledon avek SPPF, alor zot decide fer lapolis zwe gro lebra. Sa kalite latitud i pabon pour nou demokrasi e fodre arete.

Kensel Miting Bel Air

Sanmdi le 22 Out, SNP ti pou fer en miing dan lakour Mr. Luc Grandcourt, Bel Air. Malerezman nou ti bezwen kensel sa miting aköz nou ti ganny en let sorti kot Mr. Quatre ki ti enform nou ki nou napap drwa fer sa miting. Rezon ki i ti donn sete ki sa landrwa i en landrwa residansyel e pou afekte drwa lezot dimoun. Eski Mr. Quatre i kapab dir nou kote dan Sesel ki pa en landrwa residansyel e kot ou pa pou afekte drwa lezot dimoun? Letan SPPF i fer bann aktivite dan carpark bann flat, eski sa pa dan en landrwa residansyel? Mr. Quatre pe rod defann drwa bann SPPF, me eski nou dan SNP nou napa menm drwa nou osi? Sef, annou serye nou.

Lezot dimoun pou asiste

Mr. Quatre in osi dir dan son let ki letan nou fer sa bann miting lezot dimoun pou vini. Me zisteman Mr. Quatre, nou pe fer sa bann miting pour ki nouvo dimoun i vin nou bann aktivis! SNP i anvi en gran group aktivis ki pou travay pou anmenn sanzman dan nou pei Sesel. I bet letan ou fer sa kalite deklarasyon aköz se rol en parti politik pou fer li grandi avek lespwar vin o-pouvwar. Kote eski i annan problemn ladan?

Respekte nou drwa silvouple


SNP pe senpleman demande ki nou drwa koman en parti politik i ganny respekte. Parey ki SPPF i fer son bann aktivite, nou osi nou

annan menm drwa. SPPF pe servi ladministrasyon distrikt e zot kasyet anba lapo Jj Spirit Foundation pou pa pey nanryen. Eski i pa swiv ki SNP osi i annan drwa mont lo son pick-up e fer son aktivite? Eski Mr. Quatre i anvi nou pran en bato e fer miting lo kanal? Silvouple respekte nou drwa, e si pei i dan salte, pa nou ki'n met li ladan.

Pa pou fini la

Sa semenn nou pou fer tou bann demars viza-vi lakour e menm devan Komisyon Konstitisyonnel pou reklann nou drwa fer rankont lo propriete prive dan landrwa rezidansyel. Nou pa pe file, e sa zafer pa pou fini koumsa. Nou pou debout pour nou drwa!

Pa bliy nou bann frer otaz



I pe al lo 5 mwan depi ki sa premye group Seselwa ti ganny atrape avek bann pirat Somalyen. Nou a rapel ki msye Michel ti promet ki i pou fer tou pour ki tou bann otaz i retourn Sesel sen e sof. Pli enportan i ti donn son langazman ki tou le 10 ti pou retourn ansann. Me ziska prezan i paret ki 3 nou frer in ganny oubliye. SNP pe demann lotorite pou akseler bann demars pou fer retouren nou 3 frer: Conrad Andre, Gilbert Victor e sa lot ki son lidantite pa ankor ganny devwale. SNP i repet son langazman pou ofer okenn sipor ki nou kapab donn. Antretan nou ofer nou sipor pour tou bann ki pe viv dan dezespwar, an atandan zot retour.

En nouvo depar?

Semenn pase Sesel in ganny en nouvo Sef Ziz etranze. SNP i ankor siport e anvi vwar lapwentman en Seselwa koman sef nou departman zidisyer, parey i leka pou brans ekzekitiv e lezlativ dan gouvrenman.

SNP i repete ki i trov sa lapwentman regretab vi ki nou deza annan Seselwa ki ti pe komans fer sa travay reform. Nou swete ki departman zidisyer i kontinny sa bann reform neserer ki tou dimoun i anvi war e sa i enkli pli bon kondisyon travay pour bann staff.

SNP i profite pour remersye e felisit Ziz Renaud pour travay ki in fer pandan son letan koman Sef Ziz par enterim. Ankor enn fwa in prouve ki nou ti annan rezon pour dir ki nou annan Seselwa konpetan e kalifye pour sa pos.

SNP i anvi en nouvo depar kot Sesel a enn fwa pour tou ganny en sistenn zidisyer endepandan, ki ofer lazistis tou Seselwa, respe pour lord ek lalwa e sekirite dan pei.

Protez travayer PUC

Travayer PUC pe viv dan lenkyetid akoz zot pe antann tou kalite parol lo size zot lanplwa. Dapre dernyen parol bann franse i sipoze koup lakantite travayer par omwen 150. Si sa i vre, i vedir ki 150 travayer i ava ganny sakrifye pou nobou donn sa bann sef etranze zot lapey R122.8 milyon pandan sa prosen 3an.

Malgre ki Minis Morgan in vin koz en ta koze pou kalme bann travayer Seselwa, tou dimoun i konnen ki ant parol sa minis ek son aksyon, i annan en gran presipis. Se zisteman dan sa presipis ki travayer PUC pou tonbe.

SNP i dir ki lanplwa pour travayer Seselwa kot PUC fodre ganny proteze. Dan sa moman difisil, pa tir manze lo lasyet Seselwa.

Ki rol Morgan dan Gouvernman?

Iremarkab ki Minis Morgan dezorme in ganny en nouvo responsabilite dan gouvrenman. Apre son fiasko \$4.5m dan proze Zil Perseverance, nou war li pe aprezan vann nou pei par bout! **Koman PUC in sorti anba responsabilite Jacquelin Dugasse, Morgan pann tarde met nou sel lakonpanyen elektrisite avek delo dan lanmen Franse.**

Koman Minis ki responsab pour transport, Morgan i tre okipe pe rod nenport lakonpanyen etranze ki pare pou vin ansarz management servis lo por, lo erport e lakon-

panyen transpor piblik. En lakonpanyen Sengaporyen e osi Arab pe deza montre lenter e erport enternasyonal, tandi ki bann Sid Afriken ki oule SPTC.

Lelep Seselwa i oule konn laverite. Ki sa bann plan anba bol ki gouvrenman pe travay lo la? Eski Minis Morgan pe zis ganny servi oubyen se li ki pe met aplikasyon prensip son sef pou vann Sesel? Atansyon byento nou bezwen demande 'Oli sa R122.8 milyon?' Annou pa oubliye ki Seselwa pa ankor zanmen konnen kote son larzan in ale?

Lotorite Lasante pa responsab

Gouvrenman ankor enn fwa in kasyet lenformasyon ki konsern lasante piblik. Sa i konsern sa 23 sipe pirat Somalyen ki pe ganny detenir dan prison Montagne Posee. Tes kin fer lo zot, i montre ki 4 parmi in teste pozitiv pour viris Epatit B, en maladi ki transmit par seks.

Semenn pase, Minister Lasante ti servi SBC pou akiz en zournal komkwa i ti pe senm lafreyer parmi popilasyon. Sa i en latidit arogan akoz an premye lye i ti responsabilite Minister Lasante pou les piblik konnen ki ti annan sa sistiasyon.

Vi ki sa menm minister in deza eksprim zot lenkyetid ki prison Montagne Posée i enn

bann landrwa ki a risk avek sitiasyon SIDA, swivan letid ki'n montre ki bann prizonyen laba pe annan relasyon seksyel antre zot, Minister Lasante ti merit koz lo sa sitiasyon piblikman. Me parey labitid zot in prefere kasyet, e akiz lezot koman iresponsab ler zot pe selman fer zot devwar.

SNP i demande ki gouvrenman i pratik plis latransparans e vin pli responsab anver lasante nou popilasyon. Zot tro kontan kasyet. Fodre pa ki Minister Lasante i rode kote zournal i ganny son lenformasyon. Se zot responsabilite pou donner. O-fet zot bezwen rekonesan ki zournal i fer li dan en fason responsab. I annan tro bokou ki nou konnen. Pa pous nou pou ekri plis ankor.

Lavi i tro ser dan Sesel

Seselwa pe soufer tro bokou dan son pei Sesel. Lavi i tro ser. Pri marsandiz i tro ser. Gouvernman SPPF pa pe fer nanryen pou fer desann pri lavi. Aret vann Sesel e regard byennet Seselwa silvouple. Nou fatigue avek sa kalite lavi. SPPF, aret fer Seselwa pas martir!

PAS PARTOU

Anvoy sa zofisye lekol drwa imen
In plis ki ler pour lotorite lapolis anvoy enn zot zofisye, ki normalman en zofisye trafik, en kors lo drwa imen. Konplent ki pe annan lo sa zofisye resaman, se ki i pe pas partou ek bann MP e flit dimoun anbonavini obor semen avek 'pepper spray.' Si lapolis pa pran en ka avek li, Seselwa ki'n ganny ase avek son lorogans, pour pran aksyon dan zot prop lanmen. In deza annan en lensidan kot en madanm ti bat li avek koko lasose? Atansyon ki dezyenn lepisod i pli serye.

Sef i servi leskiz AH1N1

Telman zafer dan Miting Konsiltativ ti'n tro so, sef in rod premye leskiz pour li abadonn bato an servan leskiz viris AH1N1. Kan ou konnen ou ti pou drwa kestyon, pa ti en bon zafer pour ou fer dayo.

'House boys' Endyen

En serten gro Zofisye Gouvernman ki kontan frekant lotel pour dezenen e dinen i anploy 2 Endyen pou travay dan son lakaz koman 'house boys'. Sa i tre enteresan kan nou annan en gouvrenman ki swadizan pe dir nou ki zot met Seselwa premye. Nou pou regarde kwa ki Jj i fer lo sa size. Lelep pe note lo peron!

Ki pe arive avek pirat Somalyen?

Letan Coastguard ti ganny demande pou al ranmas bann pirat Somalyen, napa kalite tapaz ki pa ti ganny fer lo SBC. Ozordi nou pa tann nanryen lo size sa bann pirat Somalyen. Nou menm aprann ki gouvrenman pa konnen ki pou fer avek zot akoz tou sa bann sarz pa debout, e lakour in menm larg detra lo 'bail', me selman akoz zot napa landrwa pou reste zot ankor dan prizon.

Sa bann pirat se en gaspiyaz letan. Lontan Gouvernman ti'n devret sanz zot an-retour pour nou bann Seselwa presye. Ozordi sa bann boug pe zis byen pase dan nou kaso tandi ki 3 nou frer Seselwa pe soufer. Zot al kot dokter, dantis, e ganny byen nourit tandi ki nou Seselwa pe soufer. Eski Morgan i kapab dir nou ki i pe fer avek sa bann pirat?